

補

勤

詩

存

補勤詩存卷之八

山陰 陳錦 豐卿

滄海重經集 乙丑夏

庚申辛酉以來東南多事滿目滄桑予適從軍南
滬間航海者屢既平江南凱歌甫奏乃以捻逆北
犯復有淮軍渡海之行乙丑夏五再從鼎軍航溟
渤道津沽六月渡黃南沿汶濟扁舟萬里抱火宵
征所歷驚濤駭浪邊烽瞰雲可謂重經滄海矣作
滄海重經集

江南鏡歌鼓吹曲十二篇

中古文臣以韻語紀武功吉日車攻弁冕風雅逮平

詩亡茲事遂寢而漢魏晉代有饒歌至唐僅列戎樂
柳柳州補其詞猶近古也咸豐壬子寇入江南曾滌
生節相督皖楚軍討之訖甲子乃平曾仿香山新樂
府成東南壬甲一編畧舉時事時李少荃中丞巡撫
江蘇與平大亂小臣躬逢其盛安得無詩顧以軍書
旁午而止已而因事去官轉得竊取古人文字次第
奏歌如漢唐篇數亦知萬不逮古而追隨桴鼓幸及
見聞歌詠承平所不敢讓乙丑夏并序

大師航海達滬始取江南作江之永第一

江之永不可方海之波阻汪洋蚩尤旗竟天長大師平
楚皖下荆襄 帝咨相臣疆南疆南疆草澤腥豺狼三

十六邑紛秣穰洪水溢桑田滄將星如斗拂扶桑北平
在漢西平唐登呂公車破浪翔駕火牛鞭鼉梁萬人揚
沸呼餘皇憚華戎沙梯航蕩海垠雨浪浪鍵寸土長城
當

先是夷兵會克三城尋復陷師再克之遂平
浦東作鼓一鳴第二

鼓一鳴刈長鯨亂歇浦東南行內將將外將兵煖脣齒
砥由庚吳淞翦南沙耕蘇臺麋鹿遊魂驚穀遁壘浚降
阮封骨劓籍俘氓發武韌奏神京國有人今天可擎長
揖謝鮫民援兵罷昧樂無聲

撫軍自將以討抗命之賊大殪之作雨隨車

第三

雨隨車蟻出垤笄其旗駟牡驥天河水洗妖孽躡蟲沙
擣獫狁積屍如麻萬刃血岳家老軍作元戎淮北健夫
走如風叔子田暴虎從屠封豕席哀鴻燭幽谷雷隆冬
臥榻旁斲僵龍彼昏不知胡內訌

用降卒克金山銳軍四出肅清松太迺取蘇
境作禽在四第四

禽在在囹圄則人之虎在在檻皇則臣之伊何人之沐
之薰之伊何臣之旅之軍之廬穹廬芻蕘芻伐毛剔髮
生完膚封狼食熙熙食軀戈矛反噬車倒驅先歸免死
來于于出寸紙符寶十城狐夜活數萬新頭顱埽兩郡

孤胥吳舟師徑渡昆山湖凌茨蒲荻言租其租

廣常勝舊軍復用外洋船礮蕩埽蘇屬直逼
省垣軍其三門合攻之作鐵網張第五

張鐵網鐵網張鍛賊羽引其吭烏礮兒順而長鎧甌裘
囊飛鎗落地花千丈強登巢車布指量 帝曰予惟臣
戎羌俾復我土疆前軍噪踰重隍大將裘帶淦中行蚘
髯兀在旁銜燭龍釜頰魴澱湖水衡方羊磨刀霍霍髡
新降鹿在園敢在房十萬軍軍跨塘

師圍蘇垣賊知不免哀程軍門丐其死以賊
目八人降賜冠帶有差作雲車高第六

雲車高上青天樓船火噴狼煙望亭下吳江邊角距落

毛髮寒背芒拔頸組駢殃池魚將軍憐哀脅從忍殲旃
鋌而走闕長川崩厥角涕漣漣曩受敵以身先今受降
經中權追放豚揮蒲鞭烏可已慎勿言卉服戎官在軍
前八人頭顱肘後縣

降目請各率其眾自成一軍守省門未許遽
出斬之乃降全城作履虎尾第七

履虎尾不啞人十千虎子現人身縛虎虎不動縱虎虎
狺狺洞雲一夜黑草木餘春腥萬人看虎色如土一將
顧虎雙目瞠霹靂在手青天鳴抽刀陡起虎頭落新換
衣冠死猶著一軍驚四座愕鮮卑兒慘不樂閉降城九
門大索將軍下令鉏元凶貸同惡強項伏誅鱗爪弱孰

能與於斯神武而不殺

既遣蘇垣降眾遂攻毘陵郡邑並下之通水
陸孔道交趨金陵作居有那第八

居有那虎渡河啟廣宇停天戈禳祲氛命國讎廓四境
平不頗論戰功 帝曰多汝惟不殺南方訛海可徙況
其他金焦山墊鯨波杭一葦帆檣摩斷溧水撲飛蛾發
鉅橋瘳薦瘞投甲舞揮絃歌白門柳賊之邁賈餘勇萬
人呵曰予其靖大魔

大師會克金陵江南平作大師遇第九

大師遇在金陵螻蛄穴槐國噩夢不得醒深山有飢狼
道路無行人百千熊虎貌換得鞬上鷹高臺雨成血鬼

哭鍾山青天生李忠武墮地應長庚衡陽歸不得世上
多機槍飽食鄴架書拄腹刀槍鳴百戰下江南瀚海樹
風聲飛輪溯上游賊膽爲之驚建業一抔土唾手還
朝廷失之泰山重取之鴻毛輕不有汾陽王誰與同舟
行功歸丞相度碑勒淮西平愬武顏允通一一垂大名
謝家子弟多親兵大師遇在金陵

諸軍畧蘇常惟浦東一軍入浙界克嘉禾遂
會浙師攻吳興浙西平作寇之窮第十

寇之窮矣惟浦伊東彌江蔽湖負嶠以雄公曰無畏一
二臣同靡此疆彼界環以攻鴛湖鼎沸鶯脰紅蚱蜢飛
薨薨百足尸僵蟲鄰之輯矣罔不冀介而馳馬龐龐賊

西征競南風洞庭七十二峯煙霧空西湖一帆雨飄然
來吳中中流砥柱誰之功

撤散常勝軍請於 朝敕夷將戈登還國選
鼎字十營自習外洋鎗礮駐松江留守作魯
陽戈第十一

魯陽戈出西極客將星朝天日同勤王共殺賊彼爾之
華死則烈惟戈成之 帝授職前將軍左右翼目無全
戈氣填臆吞舟大魚網可脫降王之頭義勿活尙方賜
衣命可錫崑山之城誓勿割阿奴火攻無多術鑄鼎有
人象其物彈中礮鎗中石閉門自鍛鴻鑪鐵無所用汝
行且歸犒牛勞酒橫刀別歸時告爾可汗知河山帶礪

安如帖下馬投戈拜令公令公姓李應須識

東南餘賊盡踞浙湖被竄入閩勢復張師航海援閩廈門並分道由江右迎勦作萬里師

第十二

萬里師逐飛鳥岸八閩濱三島釜底脫全湖枯魚漏荒
沼困獸鬪且走狂瀾挽復倒瘡谷嗥羣狐腥羶織叢篠
長劍割南雲馮夷爲清道雙龍搏扶搖登山不露爪林
深路如簣十萬賊猶少楊郭故將門提兵出天表一戰
洗蠻峒再戰散猺獠礮響隕武夷頑雲色都愀是何鬼
蟻鄉殺人不加草明明棧道修仙霞嶺樹杪暗度背水
軍先盪毒龍腦五口爲一家聲援不在小餘威震四夷

海邦大有造作此饒鼓歌以壯我元老

閏五上澣隨潘琴軒觀察督師航海赴直東應

援三日抵大沽有作

雄師曾趁海潮來

皖師初下江南亦乘輪船

天意先儲將將才北部

軍聲驚嶽麓

時僧即勒捻之師大挫於鄆城

南風餘競翊燕臺親呼勁

旅綸音播

廷旨稱我軍爲勁旅

重寄長城鐵礮開傳語鯨魚

休跋浪一揮旌鉞渡蓬萊

天半饒歌擁巨舫練成鵝鵝狎飛濤師行北陸星辰近

日出東溟鎧仗高六月勤王符雅樂一軍浮海是龍韜

艤艫載有瀛洲客羽扇輕風拂大鼇

赤雲如繖蔽長空裹甲宵征下大東振鐸遺封餘免瘡

賊逼荷鉏羣醜散龜蒙賊黨多將軍百戰親枹鼓士卒

三年習火攻莫怪專車多重載礮輪新鑄首山銅

星郵傳檄送行營楊柳青青第一程潮落沙頭空燕壘

大沽爲僧王防夷駐兵處礮臺遺址至今尙存月明橋畔度鵲聲還山猛虎聞

風慄逼岸蛟龍望氣驚謂沽口夷兵愧我無端磨盾墨江湖

遷謫不勝情

過成山至之罘

自海邊東出數百里橫亘中流舟行每繞過之

銀濤無際露煙鬟掉尾神龍入海還地脈橫空伸一臂
扶輿有柄指三山東來星斗手可摘南徙風雲路漸灣
蜃氣高華鼇戴重樓臺金碧絕人寰

答趙桐孫

天心厭亂事干戈，幾輩書生盾鼻磨。
杖策行間文字賤，談兵紙上將才多。
空將雞肋酬長鈇，難得鵝膏瑩太阿。
畢竟毛錐還有用，龜山其柰斧柯何。

戎衣短後轉貽羞，草檄燈前亦壯猷。
世上於今多驥尾，生涯何處不蠅頭。
匡時事業提三尺，應運人才屬五侯。
努力勸君餐飯健，明朝馳馬發盧溝。

自憐弱冠弄柔翰，按劍長當健僕看。
萬里遠隨人作嫁，一身輕爲我無官。
鈴聲鞭影遊還熟，詩卷篝燈夢未寒。
敢道從戎非始願，梯航扶病太無端。

長途如熾載炎歊，履險纔離海上舳。
借箸三年悲宦迹，出車六月助詩豪。
星辰北拱燕臺古，風雨東來魯望高。

不戰成功叨 帝力有人先我詠同袍

過楊柳青

天津南三十里

傍水成村柳色妍
估樁密織大隄邊
河流入海不忍去
七十二沽相轉旋

閏月二十九日過滄州

千回百折導行舟
水近長蘆向北流
拋卻輕車登畫舸
辭家一月到滄州

大沽礮臺

好憑天險鞏神洲
百尺高臺瞰怒漚
拍岸有風橫海蓋
攔江無路幻沙頭

海口攔江沙亦名海蓋

樓船幾度愁
王濬銅柱

何人識馬流
一倒狂瀾千古事
洪波隨意上盧溝

寄南中子弟

浪迹無端逐轉蓬
高堂歸計正怱怱
出門忍作無家別
鄉夢模糊到客中

亂後思歸願未償
扶搖催我裹戎裝
故園松菊猶存否
待我來親晚節香

舟行遇雨再寄南中

萬里平沙一望同
北風吹雨下長空
夏雲道我思鄉樹
幻出奇峯似越中

宿連鎮故僧王灌粵賊處

萬戶人煙一水通
長隄十里捍西東
將軍有馬來天上
窮寇其魚入囊中
營窟早寒狂賊膽
建瓴猶記故侯功

模糊戰血知何在殘壁空餘燹火紅

百戰威名海內驚縱橫鐵騎是長城頻探虎口孤軍老
敢信鴻毛一死輕東望雲山多毅色北流河水尙吞聲
六年重踏吳橋月添我臨風弔古情

己未七月南
旋時宿此

暑雨贈趙桐生銘時同行德州

篷窗獨靜坐俄聞笳鼓聲仰視月當午天雞時一鳴傳
呼遞河千步隊方宵征喚起蘆中人解纜重行行沿塘
導炬火隔水喧銅鉦夜行十餘里始覺東方明旭日照
大旗倒影弄雙旌千櫓密如簣宛轉曳長繩布帆隋無
力呼風天不應隄身高半挽上有赤日擎曲岸爲四壁
孤舟入深院偶招南薰來奇暑與之并渡瀟剛五月令

我心目瞠總苦腸中熱空銜頭上冰試探池中湯炙手
徒盈盈天公尙氣餒毋乃太逼人趙盾縱可畏其澤不
如春抽刀剖大瓜暫使心神清招涼出人事解慍猶未
曾散茲萬物悶惟有天風能奇雲起海東颯然狂飆生
長空潏濃墨畫出千猙獠蔽天捲塵霾濁浪連滄溟雷
車如轉磨半響餘瞢騰電痕動微笑砉然裂紅繒驟無
大聲色愈覺一鳴驚雨從當面來舟人其能興巨絙絆
大樁伐木何丁丁對此心魂悸將毋樓櫓傾送涼駭觀
聽造物胡多情傾盆破篷箬跳珠入窗櫺天與屋俱漏
有隙無不乘神龍含飛雹大地留餘腥蒼然暮色至快
雨時復晴樹杪夕陽溼洗出天光青仰見十丈虹坐開

迎涼襟遙知登車人值此雨淋鈴衣裳自沾溼所幸塵
土輕溝渠不見水渴轍飲長鯨但愁篷背裂勿憂馬足
痛平沙路如掌紅日又東升行人暍樹間喜看南來兵
尙言得雨少土赤不可耕車停舟亦泊水陸同一程相
逢述所見各出途中吟臥龍已沈醉隔日猶未醒有詩
不題壁負此車鄰鄰莫嫌土牆臭翰墨還自馨題罷出
門去大氣盤雕鷹

泊德州口占

萬騎東南去扁舟獨問津纜痕流似水帆影嬾於人雨
過雲生腳隄荒岸有脣舊遊誰與語衣上十年塵
千里清河水炎雲一望中沙平都是月路曲不知風村

樹多情綠斜陽無限紅戎裝何處卸遙指五秦封

軍行渡海

一軍跨海海波驚萬人踏海海水平南師殺賊賈餘勇
扶搖北徙騎長鯨冲霄煙燄天風怕軍聲鼎沸神龍詔
似火旌旗雪浪盤如山井竈飄輪駕千斤礮重壓奔濤
不汗車牛汗巨鼉弓挂扶桑觀日出津通析木挾山超
將星如斗朝天近蜃氣排雲腥甲盾五夜聲馳虎節嚴
三山風遞鵬程緊攻堅賴有彈花開絕技惟憑火自來
謂所帶開花礮彈及西洋鎗械悉用自來火未許島民誇步伐能馴卉服作
輿軍中用人更喜中行多猛士爭雄幾掬舟中指
目小舡艍長鬣人欲從海上屠封豕輪舟夷眾輒恃強侮客莫之能抗軍

土怒欲殺之夷人爲之折服

牛飲千人午汐低狼餐一爨晨煙紫蟻

屯魚貫過蓬萊鵝鵝聯羣火速催噓氣成雲揮汗雨輪

聲人語走如雷將軍四顧揚麾喜三日飛行八千里敢

是波臣管送迎掀天驪躍情難已九重宸眷海天中

百戰臣心水雲裏餘浪騰驤總不停巨艘碁布泊沽津

長城重望環畿輔勁旅先聲達帝廷莫道東山猶未

上須知滄海已曾經

故城二賢祠

祀滄臺滅明董仲舒

貌取須防誤品題仰瞻最哲故城西

武城舊邑今分爲二在河西爲故城

馬河

澹村有徑空嘯鳥

村在城西北爲滅明故里

偃室無人但割雞

入巷聞歌風已古

祠旁有弦歌巷

渡河投壁迹俱迷羨他不朽

青雲附留得馨香在大隄

百尺高樓表舊廬

德州有董子讀書樓

下帷何處不相於

凡設教所至今

皆稱下

豈因對策忘明道便是窺園也讀書崇祀獨先

蘇氏廟

相傳董子設教於蘇氏最久蘇之子姓必先祀董子而後祀其祖至今猶然

流芳猶

認廣川居

廣川故里今在武城

賢良繼起關風土三百年前聖澤

餘

董在澹臺後三百餘年

故城紳士有從河隄迎師者飲軍士不受值令市人貿易無爭其法甚良詩以美之

鼓爾孤城問水濱梁莊古驛路迎賓師行萬里逢東道此地原難貌取人

雇屨資糧已早供民膏都在不言中毋爭市價譁軍士

便是弦歌俗不同

海上行

電掣雷轟涉大川
鯨鵬一徙怒冲煙青冥返照天無底
紅日初生海有邊
風力橫眠波影凸潮頭奔立浪花煎
雙輪劃破鴻溝水捲雪如山轍未填

舟行故城夢後誌感

夢故婦綠雲女史

朦朧孤枕逐宵征
卻憶妝臺望遠情
故劍忽迴秋水盼
碎琴猶裊落花聲
斷魂無著偏隨我
獨客思歸豈爲卿
生死由來同是別
夢中恰好不分明

感夢再得二首

不隨神女誤高唐

故城距高唐百餘里

祇爲慈雲殢帝鄉

婦家北上二老

率於

定州幾度緘愁懷宋遠有人含淚續班香

內兄佩蓀歿後仲妹蓮君

矢節母家爲收遺書未刻而又以病逝

生憎北望君多病夢逐南來我斷

腸枕篋急接遺藁讀征衣無柰裏戎裝

替君惜別替君愁一掾含情在陌頭萬里除非同作客

九京應不悔封侯芳魂天上來容易錦字人間寄得不

錯恨吟詩增百感抽刀斷水水還流

海邊

無雲煙處亦雲煙目力窮時是海邊皓月分明生海上

教人錯信海連天

偶題

蝸角功名戰不休百年故紙冒蠅頭英雄載福天尤喜

賢智矜才事可憂造物怕人都識字書生從古敢封侯
紅塵十丈人如海誰替乾坤走馬牛

涼雨

柳岸三庚雨篷窗六月秋天心厭堀堞人意愜颼颼戰
馬嘶風喜飛蠅斂翼愁明朝開閘板一夜漲河流
樹色迎涼潤天光向夕低平沙潑淫潦涸轍碾膠泥濡
軌波三尺扶輪水一犁師行須似此民望慰雲霓

行行行 誌師行車馬之勞也

行行重行行萬里南來兵我言萬里兵來苦道逢千里
迎兵人借問迎兵且柰何裹糧裹甲沿運河河下舟行
紛如雨河上車行疾如梭五人共一馬十人共一羸鑼

鍋猶是長夫馱沙阮火熱炙弓韉馬羸車敝不足用車
人猶道軍裝重打牛惟恐牛角崩策馬常憂馬背痛莊
民愛畜如愛兒幾家藉此供耕種長官下令三五申捉
馬應差兼捉人悍吏下鄉百十名索馬不得還索銀賄
免殷黠役貧僮道墟老弱代男丁小縣民窮打過站原
前進謂大縣添車三百兩烏犍負鼎若移山款段濫竽
之過站供立仗窮鄉野老三曰飢如此長途行不慣將軍單騎
揚前旌夜半嚴催笳鼓聲軍士鞭人人鞭馬馬吁牛喘
人不停馬牛人背同汗血手足焦黑頭面頰炎威逼人
馬病暑吹下東山古零雨涸轍成河灌沸湯熱濺衣裳
土沾股輪輶傾陷入深蹊一步千金萬馬嘶大繩牽馬

馬足蹶大聲詈馬馬耳低車中攬轡徒吁嘻
譬耕石田扶泥犁忽聞長鞭鳴霹靂四馬背痕一條赤
十人耶許肩車輓掀公於淖行一尺行一尺車無轍以足捫途足
指折風涼月黑雨初歇夜來到站求飲食前路縣官好
供億行行重行行莫怨南來萬里兵爾民推車三日走
我兵徒步還長征長征萬里不知處爾馬爾車自歸去
其二 誌師行舟楫之多也

行行重行行行行漕河曲漕河曲水流北陸南師千里
馳艫舳南師艫舳何壯哉觀水曾經滄海來海船一載
數千石輝煌金碧成樓臺上有熊羆百戰之士萬人坐
下有江南三月之糧積成堆飛輪齊泊重洋畔艫舳巨

艦瓜皮換一船換百十換千步隊如雲尙在岸唱籌萬

斛當沙量載礮千斤怕牛汗津門遠近舟楫空楊青古

驛獨柳東

獨留村亦名獨柳

帆檣林立不知數兼旬裝載人力

窮御河如帶西南繞帝命全軍行水道將軍臨岸

啟行遲守士沿途供具早荒隄修築久無人岸窄泥坍

水不深廢盡糧艘變划子

時糧船盡毀改造小舟爲糧划子

兩朝遺制

難追尋北風吹入大沽口如此雄師不常有水底聽之

驚魚龍道旁觀者徧楊柳時有兵車近水來馬蹏颯影

參差走紅日如焚當午擎危檣高與兩隄平探湯炙手

手可熱譬若抱火入深阮舟人但恐篷背裂汲水洗篷

成雨聲須臾九天眞雨下一片黑雲頭上化後船猶夾

赤鳥飛前船已掣烏龍駕蘆篷曬老箬縫羶明珠跳下
涼無價布帆斜挂漾晴雯嬾惰無心似野人一隴微風
吹不動舟人喚之殊未應雨過河邊泥路滑明日牽舟
齊上牖牖板全稀水溜乾人聲喧鼓鬩河干船頭攪纜
團團走去天尺五登天難吁嗟乎世上滄桑容易改一
軍瓦解千軍駭勁旅如山接戰遲應援賴有何人在泛
舟似此不嫌多餼糧自裹積倉乃甯使爾民道我徒梯
山勝似爾民盼我早航海行行重行行爾舟從我且東
征迴帆下水急如箭別載凱伍歸津門

時崇地山侍郎
撤東昌防卒還

夜坐

閉門生怕讀書癡贏得漂零鬢似絲枕上有懷都是夢
客中所見易爲詩津梁無偶閒愁起燈火多情獨睡遲
二十年前兒女態筆端紅豆尙相思

舟行卽景

極目平沙夕燒烘瞳瞳殘暑壓孤篷雲低老樹生奇綠
雨逐輕塵漾軟紅樓纜一肩擔逆水布帆三面受斜風
急流不敢朝 天闕纔得西來又向東

風雨

忽從西北失炎暘頭上滂沱蓄意將水氣溼團莊樹黑
天光低壓海塵黃早知風雨月先暈昨日暈今乍過雷
霆雲便涼潑面驚沙飛不起長途行潦熱如漿

臨清州南遇大風暴雨

昨夜月暈大如盤今日行舟看雲端雲端膚寸一痕黑
猛聽舟子呼停船北風正好停不得黑雲頃刻來眼前
雷轟電掣日色黯傾山倒海波浪掀驚塵潑面如雨下
雨花成片風倒旋旋風到地復飄起搏沙凜雪飛上天
千斤鐵索沈水底船頭繫纜絆長竿風聲雨聲怒相搏
馳驟萬馬聞揮鞭要開篷窗排闥入蛟鼉咫尺紛蜿蜒
譬若行師夜半遇強敵萬弩齊發攻一偏孤城如卵幸
不破四圍矢石已洞穿又如黃河水滿瓠子決危隄三
尺捍長川屋小於舟頂未滅浪花高潑門戶湍息心屏
氣意殊慄電光乘隙窺我還睊睊坐欲如山山亦動履

欲如地地終縣山奔地走我安往騎鯨若不學神僊驪
龍豔我抱火臥子舟中多軍火搜拏不得口吐涎雷公問我借
斧柯要鳴金鐵刈腥羶立黃戰血披大野權奇靈物黑
處團陰陽鼓盪有時倦雷車遠走風力縣炎威被逐下
東海青天露體星朗然下界風雲如此惡明月祇在空
中看蟾光照地有餘溼篷背不斷流飛泉人身一汗奇
熱解久懣思噓胸次寬造物有此大呼吸驚心動魄成
殊觀我欲吟詩天欲曙夜涼如水偏不眠日高一丈且
假寐夢魂猶在雲水巔

戲詠明月

來從海外看行吟去聽深閨話藁礎月替人間寄私語

補勤詩存卷之八

六

銀蟾端不病聾暗

六月望後一日立秋

西風吹面有餘暄桐葉驚秋落故園
今歲光陰剛過半
他年時節已中元
今年五月遇閏故云
五更一雨涼初到
十日三庚暑未完
料得青燈明月裏
征衣催寄北堂萱

前題再得一首

北風吹雨吹還歇今日涼風涼更吹
平地陰晴能及遠
近天寒煖不干時
北方立秋驟涼立春驟煖地氣使然
非關桐葉秋期早
祇爲荷花生日遲
薄暮聯檣行水蕩嫩寒侵背
衿衣知

聊城道上

懷刺難安蠟屐身
執鞭來作濫竽人
理當窮處方言命

德到孤時始有鄰
零雨東山偏放權
乘風北海卻扶輪
莫將孟浪嫌河水
多少行人要問津

不須投筆本無才
祇爲吟詩腸九迴
燕尾也隨鵬北徙
馬蹏還趁雁南來
弓刀小隊三更肅
燈火篷窗一卷閒
底事千斤挽強弩
徑彈長鉞上燕臺

江南獻賦畢
饒歌忽向天邊學
荷戈紅老榴花重
五再
秋零桐葉十三多
音書漸逐刀鏐遠
歲月今從盾鼻磨
那得頭顱不如許
苦吟身又著弓韉

鞭鐙追隨百丈塵
識途老馬步逡巡
肱原有用偏須折
指縱無名也欲伸
席帽未能離故我
酒杯終竟借他人
同舟賴有青雲伴
萬里山河共苦辛

過閘

出峽濤聲萬馬奔建瓴高勢下雙墩急流隄石穿篙孔
曲岸橋梁齧纜痕千里通渠開御道百重鈴束壯龍
門鯨波直指盧溝去極北風雲氣早吞

張秋道上望嶽

飽聽船頭活活聲北流千里射飛鯨波光到岸忽迴折
帆影隔隄時倒行大造獨尊宗子宅名山宜有聖人生
岱雲三面青如拭曾向煙臺看一程

渡海經蓬萊望見
峯巒卽岱嶽所在

張秋渡黃

漸看山色近歸程一卷詩成指繭生橫海家書沈雁影
繞船鄉語接蟲聲纜痕牽我遊千里篷罽窺人月五更

羣舟往來滾滾河流涼雨後片帆南渡趁新晴

鴻文無範瀉驚濤一片洪波蔽魯郊濁浪澆天濃似酒
飛流削岸快如刀負舟橫去風難直戴土狂奔溜獨高
千古不衰龍馬力要趨東海撼靈鼇

白蓼花

祇許伊人此溯洄一空色相臥江隈香消菡萏蝶初瘦
露溼蘼葭雁不來水國無人橫短櫂秋風有影浣蒼苔
沙灘明月涼如洗肯讓蘆花獨自開

來汶樓

樓在運河分水龍王廟側正對汶流汶水西流至此
七分南下三分北行爲運道地勢最高處

泰山之麓多高流四百七十八泉紛上游

濟運之泉出山東者此數

神龍脊背汗如雨淋漓下注成鴻溝濟河伏流不可見

汶河屈曲來如綫雪浪橫衝雲際樓蛟鼉日夜聞酣戰

六百年前無地僊此河從未解朝天不借巨靈擘山手

誰鑿地竅飛流泉奇哉老人力徙海

白老人英開此河今有廟在隄上

驅牽萬壑神揮灑昆刀剖地如剖瓜水體砉分左右解

右梯巨壑迢秋潮左隧重閘棧怒濤貫頂穿渠披匹練

羣山仰見天河高挽輪到此帆檣織珍重黃流寶涓滴

百萬脂膏一水鋪可憐千里河無隙浮生恨晚一登臨

不了雲山齊魯青底事沿隄增壁壘餘波猶帶毒龍腥

如王廡下離離草

樓旁有禹王廟

十年塵土今纔埽報道樓前

有米船南來重試行河道

是年吳誦先漕督用民船試運京米過此相值

補勤詩存卷之八

補勤詩存卷之九

山陰 陳錦 畫卿

東征磨盾集上 乙丑秋

師駐任城日事案牘每值蟲聲滿地雁影橫天萬
櫟宵寒一燈夜靜披衣吮筆捲甲裁箋車塵馬足
吟五字而未安盾鼻刀鐶手一編其不置得詩惟
倍分卷爲三

任城鐵塔寺謁邸帥祠望太白樓贈復初上人

釋迦古寺不知年

寺本號釋迦建自北齊皇建中宋崇
甯乙酉始有塔七級明萬曆九年加

二級遂
以名寺

浮圖現出一指禪誰家有此大鐵筆倒豎佛地

穿雲煙敢是吾鄉賀監眠井底不然太白昂首來問天

紺宇輪囷壓叢碧晨鐘一聲大河白

塔東有鐘樓名聲遠樓

六朝

魏第煥精藍半壁紗籠動詩魄橫海蓬萊一段青獨標
孤影立亭亭老衲胸中有邱壑位置竹石栖僊靈四郊
多壘山水惡上將借此停車旌忠孝風流愛留覽戰血
大洗刀鏝腥丹臺乍撥煨芋火虎穴遽殞騎箕星星精
眷此不忍去靈旗返影緣庭樹生前供養已煙雲歸魂
合其維摩住褒忠祠宇滿寰中此塔千年鐵先鑄我來
更上一層遊憑弔蒼茫對酒樓

太白酒樓在任城堞上

南湖波浪

黏天綠

南陽湖在任城東南

僊蹤佛果同高秋瀚海吟詩逐戎馬

天風浩蕩吹鳬鷗登臨不敢題姓字多少名人在上頭

過海僧

金陵賈某被難無家隱緇流者十年僅以身免蘇垣
既復挂錫古寺中予同年友劉夢九僦居寺舍輒往
過之見僧事劉惟謹及渡海從戎有自軍中訪劉者
卽是僧也蓋劉知僧有婦無兒勸還俗未決而遽爲
易服偕來眾莫之知予旣奇僧之遇而又善劉之勸
也爲誌以詩仍隱其姓氏云

有酒則學僊無酒則學佛是謂物物而不物於物無家
則爲僧有家則爲民安得人人而各人其人憶昔江南
沈大劫周遺黎民靡有子不從天外作逃禪生怕泥中
溷人迹死者已矣生者孤一身之外餘髮膚心甚短髮
甚長有髮如此不如無快刀祝髮髮盡落新置袈裟仰

天著毫無遺憾好頭顱不降強寇降菩薩饑不食虎餘
飧木樨香飯飽空門渴不飲盜泉水楊枝法雨清且美
面目全非了此生再生有願待清平十年足裏菩提樹
百戰人空羅刹城此時始覺身未死錯被寰中閭姓氏
天台前度見劉郎似曾相識偏來此慣向風塵拔異人
此僧卓犖行將仕攜得頭陀釋褐來神僊渡海接蓬萊
等閒拋卻香花供結髮從戎殺戒開瘦骨自憐賈島佛
童頭人笑賀方回家室重尋完破卵鄉關未許音書斷
要憑我佛祝封侯教人世外名心煖驚看三山纛影高
莫愁彼岸鐘聲短極樂西方避亂身天教留待愛才人
回頭萬里隔滄海破衲一肩天際雲

初至任城見越峴老人宗滌樓先生稷辰時任

東河巡道

大塊茫茫戰馬秋珂鄉老輩幾風流薦紳久仰靈光殿
衣錦還登太白樓諫草如山寒繡襪公會爲給諫有直聲書城似
海擁鳴騶鑑湖裙屐當年事別後滄桑迄未休

青可厂中月自明

厂在越中詩集後公所創建

朱顏猶是駐任城紅

塵大隱歸朝籍白髮華簪見太平三索得男維嶽降公抵

東河年已七十猶舉三男

十年一笑爲河清

漕渠停運十年今復試行

文章報國

心無已舊買名山尙未耕

一徑樵風泛若邪琴樽聚散憶搏沙談經席煖陽明洞

公會主戴山講席

捨宅名留逸少家

右軍捨宅爲寺公亦捨龍山舊宅爲

四賢倦鳥知還猶繞樹換鵝有字早籠紗公善書不容

本讀書種子今誰屬半是公門桃李花吾鄉亂後讀書

遙瞻山斗岱雲中橫海從征下大東舊事傷心聞詠絮

內子勞蓉君及勞氏閨秀與公女沉芳向爲吟詩侶今皆早逝宦遊如夢墮漂蓬廿年

桑梓懷詩老萬里關河識放翁一櫂壺觴秋水滿壺觴爲

賀監飲酒處尊鱸消息幾時通聞故鄉大水正以

再詠大沽礮臺臺爲僧郎帥禦夷所築庚申之

於茲矣我軍至不旬月而夷兵遽去遂復礮臺

十年烽火撼潮頭百尺高臺世外留餌敵何曾圖督亢

和我終不借荊州天山羽箭傳飛將我軍初至大沽駐

人疑恐交迫海嶠靈旗返故侯謂郎一夕長風驅蜃市莫教

噓氣輒成樓

次任城妙香菴

妙香聞斷月初斜清聲聲攙戍鼓搗祇怕單衣寒入骨
忽驚枯管怒生花天邊有雁書沈海故國其魚夢到家
間故鄉 水患 愛殺老僧好頑健刀槍羅列曬袈裟

七夕

秋風獵獵動琉璃戈劍戟如山夜氣多莫便沖天射牛斗
鵲橋今夕正填河

贏得閨人望遠愁剖開圓月不成秋分明破鏡飛天上
半在鍼樓半戍樓

迴文花樣換雲霞舊更如何新孔嘉不信軍中無七夕

東山從古卻思家

孔嘉句謂鄭步山

荷澤行

捻逆之亂歲辛酉親王僧格林沁奉命率部追剿
山東河南諸路千里百戰屢擒渠魁王公忠性成一
入軍中不聞家事十年馬上髀肉潰爛腕瘡膿腐以
鐵鉤貫臂三年不伸臥不解衣蟣蝨盈把日與羣下
共甘苦飢渴寒暑晝夜窮追歲甲子秦中賊由楚豫
淮北而南乙丑三月王師自歸陳曹濟渡運北至東
平南至鄒滕東至贛沭仍回充濟荷濮轉戰環走數
千里諸將疲於奔命請少息王曰我臂創痛入心脾
豈不自惜顧師行緩則民禍急速之或及救也四月

王至曹州二十有三日戰不利諸將失道被圍於高
莊吳樓兩圩閒西薄河泊賊截其東不能退守破圩
待援不至夜奪圍出比出駭奔王騎屢蹶行益後未
及曹郡十五里墮馬傷股追至矛中王肩王怒拔刀
自戕從騎得尸麥田中置濠者再覆茅以免明日興
尸歸曹後軍敗失過半事聞 朝廷震悼詔葬祭加
禮賜諡忠從祀 太廟誅救援不力者 廷旨下江
南派師援北錦從師渡海至濟上歷曹郡諸邑因得
聞王豐功壯烈並謁祠宇瞻仰儀表恭紀其事作荷
澤行

四月秋風荷澤搖大星隕石東山坳龍煤汗血四號熱

劍氣不吐弓聲號松林月黑虎夜掠裸葬活佛荒田茅
吾王早具迴瀾手縣腰金印大如斗十年轉戰兩河邊
自作元戎破空走迷天野燒四無人銀轡亂踏孤村陡
子弟親兵自八千縱橫百騎一身先駐節任城忽歎息
道路哀鴻水火急吾王況瘁民遮留如蒼生何留弗及
臂創齧骨髀肉枯莽莽天風行色麤破壘雲平古睥睨
荒莊雨潑新頭顱異代王孫尙隆準尋常婦豎都能識
戎衣短後逐平蕪等閒擣入於菟穴珍重龍沙百戰身
夜深毋使豺狼得殺氣憑陵老據鞏斷圩塵竈賸空團
練勇屯紮
處日圍投戈下馬不見賊頽然枕轡殊難安蠢茲醜
類逞螳臂四面環觀賊如螳左右驚疑怕奪圍將軍警

覺抽刀起抽刀指賊賊披離縱馬一馳三十里追風神
駿與天通要馱申甫還高崧振鬣悲鳴特一足弔弔墮
地仆長龍長龍羽翼忽吹散眼前麋鹿興雉叢玉山傾
倒風雲變白虹貫日光成練三卻三前鼠輩忙中肩猶
覺王能殿礫礫銜鬚馬絕聲刎身不改如生面辟易千
夫賊膽驚倉皇何意犯天人星精會有騎箕日敢縱狐
兔獵麒麟蒼涼渴葬園城下舉刀發土山神訝黃雲似
織麥田秋誰其殉之烏騅馬 九重沖聖罷臨朝 詔
收勁骨殲陵野帶甲歸來何處魂海門一夜風雨昏生
前恨事能有幾初心誓斬南溟鯤睢陽殺賊偏死後鐵
弩射落腥潮痕蛟鱓遠徙除一患

王段後月餘夷人再
退還大沽礮臺

騎赤兔還故屯神戈西指時賊由曹州西遁汴中翊綏輔明堂
免冑陪犧尊

任城太白樓

樓並祀任城令賀公逸其名唐宋以來題識皆以知章當之誤於飲

中八仙也余爲作聯語云除是知章天上更無人飲酒不來崔顥樓頭應有我題詩

放眼長空瞰大瀛酒星如斗落任城百年爭道神僊醉
萬古常攜狂客行得句可曾憐後死有天應許問先生
是誰到此題詩敢崔顥樓頭黃鶴聲

宗滌樓觀察官舍遇勞氏婦家孫輩錫穀奉母

由定州南旋道經任城嫁妹於宗適往過之感

而有作

山左尋詩老天涯遇舊婚還鄉支健婦歸妹有童孫宿

草驚三世

婦翁內兄暨姪輩
葬定州者十一人

飄蓬謝一門
亂離逢骨肉

地下也銷魂

廿載人琴感中山憶婦家

庚戌過定州
作十旬遊

宦遊閒詠絮祿

養飽栽花大幕方巢燕空林忽散鴉

佩蓀以二老喪階
罷官遂客保陽

前森玉樹容易萎春華

故里悲零落山河況阻長誰爲翁守墓

長孫錫田尚難
留保陽守墓

免鬼思鄉倩女應將母

謂綠雲
女史

安仁替斷腸滄桑凡幾

易揮淚問斜陽

指日開甥館鴛鴦下拜忙乘龍推老輩作壻見孫行小

字呼難憶家書寄漸忘登堂添一笑戎服賦催妝

再詠太白樓

九霄飛下一星白萬里煙雲動秋色杯中明月袖中詩
俯瞰萊東亂山碧主人除是四明狂醉吸沅泉消煩渴
神僊忽騎黃鶴去半空留下驚人句太行移過黃河乾
此樓猶道神僊住我輩登臨亦偶然天風吹老南湖樹

白髭吟

搏沙一夕乾坤剖大地喁喁動黃口媧皇作事故纖奇
添毫頰上誌牝牡眉髮盡得生初根髭鬚獨訂中年友
淡濃疏密花樣多廿年不死便能有穹脣突出種樹牢
拂頤點頰裝黃耆髭王墮地非國祥徑寸不毛覺顏厚
隱與齒身互消長譬若逢秋生楊柳紛披已是天老時
又苦被人呼父母過長亦復礙飲食教人歲歲翦春韭

內則未詳留髭年屆期要試撚髭手但聞古來稱美髯
畫中往往羨三綰爲蜩爲蚪俱偉男開色宜黃正色黝
禪蟲遷喬戲相公黛螺掩面懼新婦割以贈人亦壯哉
藥鑪燎著能完否銀潭如鏡不敢窺蒼龍面目憎奇醜
倒懸枝葉方葳蕤危崖土瘠催枯朽燕山八月天雨霜
一莖白草衝泥陡花木年年謝一回毫端那有還童壽
便是託根醉飽囊也防葱鬱光難久矧伊世事磨體膚
丈夫壯歲逢陽九燈宵旅夕苦吟聲昵人親見心肝歐
腠理中空顏色無有同野老常黔首琴絃彈古鏗素絲
醇醪釀熟變元酒皓然一白休復烏涅而不淄采勿受
惡其衰也拔連茹明朝依舊門生莠短髮蓬鬆禿盡時

歲寒松柏彫知後

老眼吟

顏皇造宇間鬼哭多生兩目恣瞻矚中天改作重瞳子
虞書猶是稱四目當時已苦文字煩又怕青天長雨粟
眉低未便鑿空多眼小豈容點睛複自此兩目習爲常
惟憑光彩分雅俗義取日月嵌雙丸描成肉好象鸛鵒
村農好在不識丁耄年一樣辨麥菽無端生小認蠅頭
自言此眼殊不肉下筆貪將蠹簡描窺窗妄想蟲編續
指上毛錐看一生光陰恨短焚膏燭夢中展卷還明眸
將以求吾所大欲晶瑩銷鑠不自知銀海茫茫如轉轂
空中陡覺添一物如塵如翳如絲縠肇錫嘉名乃曰花

到老方開不爲速揮之不去隨物來字裏行間鬪蠻觸
少陵云在霧中看下此益復愁鹿鹿夜來握管忌高燈
几上攤書怕深屋金籠無用休刮磨水晶有力能伸縮
隔鏡觀之乃益清一片玻瓈凸寒玉造物勸人早讀書
中年可弗親案牘無奈吾徒良自苦壯不如人老轉篤
或因白髮困青氈被人頭腦冬烘熟況今海內爭飢驅
橐筆生涯藉求祿磨牛抵死耕硯田挂蝨頻年試箭鏃
面前祇見傀儡大背後莫知蜂蠆毒眊焉眸子非不良
看花對月甯非福何妨長作擘窠書莫耽小技雕蟲屬
枉教老女充鍼神繡出鴛鴦不成幅東坡垂暮能近視
高瞻遠矚殊不足

東坡先生
目短視

收之桑榆失東隅摩崖大

字費捫讀旁人自謂青白眼轉瞬紅紗蔽明瞭祇合朦
朧歸故鄉新詩夜喚兒孫錄臥牀口背書萬篇門外松
花飛謾謾

做齒吟

河洛初生龍馬年一身齒角還兼全後來去角乃予齒
馬猶如此人亦然以之紀年生漸漸一年一齒成例沿
年多轉苦輔車窄但期口滿毋蔓延髮膚全受本無此
蟠根暗鑄毛裏先噉噉黃口乍欲語蘭芽嫩茁文具編
未離乳臭學噉飯次第生長亘中邊玉脰當春忽凋換
要半種樹正頗偏此骨無端許外露土山戴石何連蜷
豈爲三緘固肩鑰白石自鑿河自縣枉使都城過百雉

舌鋒所抵墉堞穿臂亡甯勿憚孤立身慧安肯拾言詮
顧中何日不有物火雷噬嗑爻象連大哉時義利用獄
貴鉏強梗刈腥羶河清偶一露包老賄重尤恐焚范宣
除是睢陽能嚼鐵不然蘇武齧胡蘊餘齒磊磊炙萬口
百年祇合欺肥鮮甚者被人詠瓠犀誤從顰笑論媿妍
一掾噬乾與噬腊可堪賦質分愚賢柔則茹之剛則吐
班聯玉筍成備員厯輔承顧紛闔闢誰知此齒良可憐
早歲從人敲菜根十年康穀勤磨擱少長勞勞食四方
苦隨脣舌同憂煎噬膚遇毒不一次忍痛力欲摧眾堅
譬彼地脈漸勞瘠懸崖列石先崩騫陡然一落危四鄰
辭根戀戀空糾纏半褪猶或支敗將後凋所慮存枯禪

倘信剛強理先折鬢髮胡爲同時捐麒麟有角不思觸
拳騶蹏齧殊從前造物加意摧觚稜怕張利口食萬錢
朵頤繇輒毋啞人好飲醇酒斟廉泉何意盤空語猶硬
嚼爛文字三千篇不替人間惜餘論古琴獨調彈無絃
敢告兒齒休重生但存吾舌還問天

求勞氏遺書不得

杖履歡趨憶養堂芝蘭繞膝有餘芳板輿夢穩栽花圃

丹訣香生種藥廊

婦翁又峯公著醫鏡一書庚戌之秋已成十二卷

旅櫬十年

成拱木遺書千卷失行裝

佩蓀兄以書畫名積卷如山客死保陽一散而盡如因

緣祇許青藤續移取孫枝植故鄉

又峯公幼讀徐天池青藤書屋及客京門

寓王漁洋舊邸又得古藤一枝遂作
藤因室圖徧徵題詠今其冊猶存

一門風雅本天成冷宦消閒又寫生道蘊詩才都玉立
老蘇文字故冰清可堪逆旅終三世祇爲無家負百城
斷簡僅存兵火後教人那不淚縱橫

勞氏婦拜仙以綠雲女史舊寄詩函見示

賸楮殘緇認隔生平安字寄別離情塵封尙裏懷親什
亂帙猶嘯喚母聲寡鵠多愁談舊事函內有唁蓮君新
寡詩今拜仙亦爲
未亡人慈烏有淚溼荒城謂昌
化東風一紙偏無恙還逐歸

裝萬里行

勞氏子第兒以綠雲女史手書遺札見還

廿年遺挂易星霜十紙家書在異鄉萬里傳聞慈母健
書有久不
接家信語一官初試阿兄忙時外姑方自紹入京佩兒
挈眷初伴定州蓋道光乙

已年書也新愁絮絮縫衣綫舊夢迢迢疊嫁裳最是不堪回

首事雁聲淒斷第三行書中追述三弟病歿事甚愴

如山離恨寄天邊手足關懷劇可憐內有寄瓣香姊書二函乍喜

藤陰長珊瑚書有珊瑚樹長矣一語蓋指珊石甥也時方七齡忽驚花底泣真蓮

真蓮二字蓮君來書中語也遺札內答之甚詳無端小別偏終古有約重逢竟

及泉那得多心人不死亦遺札內語唾壺愁滿碧雲箋

字裏蒼茫接斷魂當年妝閣正黃昏夢醒花月天都老

眼見滄桑我獨存下筆工愁成手澤披箋有淚續嘯痕

一回展讀一淒惋道光庚戌至定州曾從蓮君處索觀此書標識猶存珍重應同

趙璧論

絡緯

縑車軋軋動三更催送征衣到月明多費纏絲空自縛
不勝悽婉爲誰鳴豆棚人靜風如織桐井秋高露有聲
客思茫茫刀尺遠忽牽歸夢繞蠡城

聞越城大水感寄南中子弟

五百年來魚米鄉銀隄拱護西北方迴瀾隻手有神助

爲民捍患懷馬湯

湯馬兩太守先後築西北海塘

天時人事會屯蹇干

戈未了

桑田滄朝作淫雨害案盛又值風濤起錢唐

時西

塘決口大雨連朝

哀哉鑑湖九千頃一夜化作沮洳場五里一

田舍十里一漁莊浪花高過長人塘

刑塘在城北相傳大禹誅防風氏所

築

湖東湖西沒笮笮舍南舍北低橋梁星牖齊開二十

八神龍赴海殊未遑

越地水利專恃三江閘爲瀦洩近因沙淤不通

洪波旁溢

萬壑蒲村墟宛轉舞商羊浮家泛宅避高處豈無山阜
當保障其奈吾民苦昏墊樓臺倒影漂倉箱河渠久廢
况亂後萬事無復眞隄防西風夜決新築土怒浪橫埽
青畦秧宰官祈晴循故事晏然高坐哀鴻旁大劫茫茫
下澤國蛟鰥奉命來降殃誰家邱壟墮水底佳城悔不
皆高岡潮穿山脅奪文種雨崩防墓涕素王豈直間閭
病鳩鵲想見神鬼同栖皇傳聞異地滋錯愕訛言雪浪
衝陴牆逾時始識告者過家書一紙通海航上言廬墓
存下言田園荒旅人號咷而後笑苟完燕卵寬衷腸淺
租魚稅任漂泊雖無衣食勝死亡小人有母頭髮黃弄
孫得婦婦弄聲以之娛老足壽康開門四望雲水長

贈潘莘田

洞庭秋色照人清
喬木頻遷出谷鶯
百戰文壇稱健將
五年戎馬老書生
江山詩料添襟韻
湖海交遊見性情
莫道梯航千里遠
好裁佳句賦西征

乞師先已作包胥

安慶迎師之役莘田與焉

搏海鷗鵬快壯圖
烽火

家山鳴鼓角秋風
鄉里戰蒲菰
苦吟有味青燈熟
草檄如飛翰
墨麤倚馬論才猶小試
銀韋蹀躞騁天衢

寄姚花農親家

均是人間不繫舟
羨君心事付閒鷗
琴書戀戀存真我
歲月茫茫數舊遊
避亂共攬身世痛
攜家同話海天愁
可堪患難成知己
一見滄桑便白頭

杏花春雨宦情消愁裏戎衣上海橈馮婦下車防虎笑
揚雄執戟解人嘲文心漸逐秋風冷詩膽曾經怒浪澆
歸計如何君莫問故鄉家室本漂搖

一馱

去聲用

輕裝強問津東山零雨泥紅塵肱原有用偏

須折指縱無名也欲伸老死未能諳世故數奇仍不算
詩人十年浪竊多才譽贏得名場百戰身

關河迢遞感平生壯志消磨兒女情賤息無文慚玉潤
故人輕別重蘭盟燈邊夢喚寒蟬語天末書沈老雁聲
何日卜鄰完舊約俸錢同買一山耕

枕畔

六時清梵罷禪林枕畔高舂成鼓音燭影隨風搖客夢

蟲聲如雨碎秋心涼雲窳地晨光起落月銜山夜氣深
百尺危樓眠不穩驚寒空自費沈吟

題葛子材畫

竹其節勁以直石其骨堅以栗菊其色淡以潔誰爲此
圖兼三絕畫中有詩人不識咄哉子材友之益吾不忘
規子舉筆

有鼠自佛座出瞬息遁去狀之以詩

法宇涵生機蠕黽盡佛子忽來無膽蟲書叢齧故紙首
尾苦兩端倉皇失進止小心圖潛藏舉目紛睨視意常
畏人知又欲竊甘旨爲誰趨避忙局促乃如此正憂忌
器投旋伏又旋起乍聞察察聲覲面已千里何以穿我

塘誰謂爾無齒

釋鬼篇

人生老死便無物故舊容易滋遺忘設言鬼神起畏憚
頓使枯骨生光芒昌黎原鬼鬼氣喪東坡說鬼鬼膽張
庸恐遇事泥形迹務求幽渺都張皇立于庭嘯于梁尋
常聽睹不足懼豪強想見猙獰醜劣嘯吟狂不然慘悽
恇怯行偃偃或病臃腫或臞羸令人對此寒衷腸別有
柔情昵態出意造神魂縹緲通幽香積想成形疑成狀
面目如畫聲音揚名教何嘗離迹象不遺體物皆陰陽
中庸以此稱鬼德至理不費人猜詳如在其上其左右
祇此片語非荒唐傳之婦豎恣穿鑿見解乃入支離鄉

并爲一談牢不破鬼數不盡恆沙量習俗移人賢智惑
引經據典求微茫矯其弊曰悉無有頑然既死類犬羊
我爲別作釋鬼篇新鬼汗走故鬼僵事所必無理必有
春秋霜露大義毋相妨勿忘故舊此意足辨其有無吾
未遑

補作己未仲春謁岱廟詩

醫巫閭何崔嵬王氣直逼居庸來關東一龍渡遼海水
底石骨登蓬萊登萊西走起芒角迴翊三輔森樓臺岱
宗仰面朝崑崙崑崙聳千里煙雲堆中峯大脈宜作郡汶
陽城郭依山隈峩峩岱廟擬天府九天閶闔何高哉道
士緣梯啟扃鑰洞宮在目天門闔萬株松栝紛羽葆奇

疆立仗風雲隕塞門老樹兀千載裸禿垂死生新菱危
闌一曲尊宋柏好詩三代鐫唐槐鼎彝劖駁年世遠篆
文缺蝕縫蒼苔摩挲良久見字畫仁安制作存古壘中
有一壘銅善鳴遊人投石聲喧豗七十二君臨禁蹕老
物偃蹇當中階入門下馬止青輅五丁力士移不開更
有非常大手筆怕題詩句摩高崖縱橫滿壁圖險怪雲
旗星蓋移銅街一人乘黃屋萬夫事行枚弓刀各在手
狐兔走且哀十里鋒車擁獵火兩行宮扇圍松牌青紅
鬼物壁上立呼之欲下鏘瓊瑰兩圖相向出一手左圖
出獵右獵回出載弧矢回載禽面目一樣同徘徊廡下
全身描丈六回顧精采動睂鬚前身來遊吳道子點染

蠟粉腕下騰僊儕時巡久廢風雨惡安得十幅畫幃明
淨常如揩山神呵護用大力眾靈雜沓猶未塵中埋小
儒鞠脰趨墀坳仰見霞宮日觀百丈光皚皚穹碑林立
費捫讀天章系代紀望柴登封不數秦漢字應制已愧
乾嘉才當年猝未淩絕頂但見蓮峯向夕上與諸天偕
於今三過茲山下征輶聲礪如轟雷海楂眺見山背綠
驅車轉苦山容霾無詩不敢空展謁十年况結紅塵胎
老至漫登獨足盤雲梯倒墮恐被罡風推樓頭望嶽近
咫尺舊遊未續新詩裁開窗意已卑覺繹夢裏時著雙
芒鞋臥思膚寸封中雲化爲時雨天龍猜

中秋前三日曉起有作

一夜雨初歇鐘樓動曙痕鴉聲曉屋角葦語倦牆根抱
郭河流迴齊天嶽影尊燈光偏密邇殘燄照人溫
刁斗戛然止寒雞殿夜呼開門披萬鎧伏櫪叫孤驢涼
月自來去明星疑有無路長歸夢短隨雁落南湖
大野輒千里秋高馬欲肥弓刀涼翠割戟幕嫩霜飛水
泊菰蒲熟邊風鷹隼饑吟魂難熨貼寒到五更衣
戎馬書生少英雄兒女多可堪歸未得其柰夜如何好
夢投孤寺纖愁拂太阿蟾宮寒一掬遮莫問嫦娥

和答趙桐孫書得綠雲遺札誌感詩後元韻

一拋琴夢鬢如絲根觸偏逢獨客時織錦本無長命縷
輓花空費大招辭神傷遺挂君同病淚續塵封我故癡

此後風姨應不妒挑燈容賦百年詩

疊曉起四首韻再贈桐孫

大漠雲無暎帷燈風有痕戎軺新旅况琴夢老愁根渡
海詩千首澆書酒一尊與君同作客萬里共寒溫

古壘清笳喚庭柯巢鶻呼功名憂得馬身世怕尋驢眼
底滄桑大胸中冰炭無裹裝還草檄顚顚甚江湖

雨刷桂花落霜苞鞠蕾肥秋心蟲唧唧鄉思雁飛飛月
黑天龍下燈明殿鼠饑

時同下榻寺樓

推窗休問夜涼露溼征

衣

瘦骨嶮嶮甚狂吟老大多賦詩甯得已對月更如何夜
氣沈青甸晨光動紫阿會當凌嶽頂搔首問嫦娥

晚步

暮笳裂曾雲四山脫絛幕冷雨晴更飛涼月澹初靚飢
驢嘍堽牀怒蒼鬬莎壁老農荷鋤歸寺門破荒寂

涼夜

紙窗抱凍似寒蠅面壁無端替老僧大漠雲開風當雨
涼宵人靜月爲燈登樓庾亮秋先覺叱馭王尊病未能
第一戎行難得事對牀三兩盡詩朋

隨分琴書蕭寺依便參佛子喻戎機南湖浪惡菰蒲戰
古殿燈昏蝙蝠飛萬里長風梳落葉三軍秋色動寒衣
家山亂後未歸去故國琅瑯閣已非

前明朱文懿公
建小琅瑯閣

故里飛來峯云自
琅瑯山一夜飛去

秋晚野望

野景清閒畫不成，壘雲莊樹織秋坪。
棗林墮實聞疏雨，蘆蕩吹香喜老晴。
牝馬力田行腳健，雌蜚負穴鬪心生。
湖山八百懷鄉里，少箇扁舟泛月明。

中秋試馬與潘季樓副帥遊玉露菴

一徑蘼蕪到寺門，樓臺紺碧動秋痕。
喧無車馬名山貴，富有園林老衲尊。
渡海舊攜花五色，菴多外洋花草繞廊新長竹。
千根叩關剝啄來，何暮十里斜陽黃葉村。

秋風匹馬洞雲開，世外猶多避亂才。

僧月波自廬江避亂被剝於此採

藥未歸，香自熱。看花有約菊初胎。
蒲團月滿神獅伏，髮拂塵腥野鶴猜。
不道蓮池還戒殺，將軍親試射雕來。

葺太白樓旣成中秋登眺

重與神僊理舊巢
秋風秋雨夢迢迢
醉歸天上渾難醒
小住人間總不祧
萬古詩才兼酒膽
一年明月況今宵
騎鯨到此忽飛去
采石磯頭聞夜潮

秋夜寄內

三五蟾圓爪細掄
好難熨貼是吟魂
天邊兩字平安信
衣上千回聚散痕
敲枕忽驚燈欲語
側身猶惜夢初溫
教人記得身爲客
落葉飄蕭風打門

補勤詩存卷之九